

老圃良言 明 嘉兴巢鸣盛止庵述

生世业缘芟除殆尽村居荒僻祇邻并一二老圃相与往还尝为余言种植之事大要有十依法试之罔有不效嘉蔬美果实叨其惠因述为老圃良言以告世之从事灌园者

一曰下种

核宜排子宜撒其法收投头干实悬通风处临种少晒择向阳所以肥土铺半将核尖向上排定再以肥土盖之欲种莲实亦如此法子则不然须以灰泥各半将子杂拌于中按法撒之干湿得所为妙

二曰分插

先筑肥地以水渗定择根傍小枝连处截断次年移之或用末钩将条钉地以肥土壅之或将猫竹一节劈开纳泥于中合缚枝上或剪尺许以湿纸包裹及插芋卜内埋土中置阴处勿令干即活

三曰接换

接换必须相称贴大宜高截贴小宜低截对接上下各正去半片偶接上下各斜去半片插接截平本根削斜分枝插皮内合接同种两枝各削去半边俱用麻缚篾帮泥封箝裹四围扞棘以防鸟雀常将水洒更避日色若遇狂风大雨急宜遮护否则不活

四曰移植

先记枝之所向将竹刀掘起下勿伤根上勿损叶如前种之再加肥土填满四边又以小竹扞定麻皮缚牢以防风摇又以石子铺面以防泥溅如泥一溅叶即黄脱仍须浇灌得宜谨避风日数日即活或云移栽果木宜在望前则子繁多

五曰修补

须得意趣去沥水枝向下者刺身枝向内者骈纽枝连结者冗杂枝多乱者风枝细长老枝新发者仍将大枝截去以蜜涂之虫窠其上自饶古意复以马粪和泥罨其润处或用鱼腥水浇之便生苔藓尤助野趣如欲曲折略割其皮随意转折以梭缚之

六曰保护

务令适时倘风日相侵寒热暴至当以布帐遮之或篾篮覆之如遇轻阴细雨淡日和风出架庭中勿令着地恐致根长及引虫蚁盆花之法莫过于此或云花果忌麝当杂种葱蒜若既为所触急于上风烧硫黄气以解之

七曰催养

须于冬日将树掘起洗净勿伤根芽当量树之老嫩于日中晒数日干极则洒水后用肥泥拌宿壤种之若天暖浇粪数次亦可但不可晒一面犯则三面无花矣又于元旦子时将斧斑驳击之则结子不落浇社酒则子繁又以社日杵百果根则子大

八曰却虫

每于元旦将火徧照植物上或清明子时将稻草一根缚树上或种时将大蒜一枝甘草一寸先放根下永无诸虫之患若有蛀眼以硫黄或芫花塞之有蚁窠以香油或羊骨引之有蚓穴以鸭粪或灰水浇之

九曰贮土

须锄青草以粪浇之煨过再浇如此数次捣碎筛净拣去砖瓦草收藏缸内安顿日照雨洒处或将黄泥浸腊粪中年余取出晒干用之复将炭屑及瓦片浸粪窖中以为铺盆用

十曰浇灌

浇灌必分早晚早宜肥水浇根其法锄嫩青草拌阴沟泥同罨缸内久则自然流出青水浇晚宜清水洒叶其法取天落水或河池水置缸内投石子数枚澄过洒之若晚间骤雨切勿令见恐烈日晒后热气蒸花故也或云如欲催花以马粪浸水浇之数日后开者次日即开